

Australienweihnacht

Weihnachtn is bei uns immer mit Tradition verbundn:

Adventkranz, Adventkalender, Keksbacherei, Weihnachtsputz und z'letzt noh der aufputzte Christbam mit die Gschenk drunter! Iader tuat so, wia er denkt und wia er Zeit hat!

Wia aber tuat oaner, der just zu dera Zeit in Australien is, wo größte Hitz herrscht, wo's koane Feichtn oder andern Nadlbama gibt und beileib ah koa Futzerl Schnee (guat, Schnee hat's zu Weihnachtn ja ah bei uns oft schon net ghabt)?

Der Karli war grad zu dera Zeit in Sidney bei seiner Schwester, dei durt varheirat't lebt, und da sand eahm all die Sachn a(b)gangan. Die Lilli hat zwar aus irgendwölche Buschn oan Kranz bundn und Kirzn aufgstöllt und, wia sie's von dahoam gwohnt is, Keksbachn.

Aber wia sullt ma oan Christbam aufstölln, wo's koane Nadlbama gibt? Da hat der Karli a Idee ghabt: Er is die Gschäfte a(b)glafn und hat durt an Haufn Flaschnputzer kauft. Dei hat er aft mit an Lack grean angespritzt und zu Äst z'sammgmuaxt, dei er auf an Besnstül festgmacht hat, sodass a kloana „Nadlbam“ entstandn is. Den hat er aft mit Strohstern, dei er mitbracht hat, aufputzt. Ah kloane Kirzerl hat er aufigmact; Geburtstagskirzerl von dahoam.

Und wia alle am Hl. Abnd um deis Bamerl herumstandn sand und hoamatliche Weihnachtliader gsungen habn, hat koaner mitkriagt, dass draußn summerlichste Temperatur gherrscht habn.